



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

ՈՐՈՇՈՒՄ

10 ապրիլի 2023 թվականի թիվ 16-Ա

ք.Երևան

«ԿՈՏԱՅՔ ԹԻ ՎԻ» ՍՊ ԸՆԿԵՐՈՒԹՅԱՆ ՆԿԱՏՄԱՄԲ ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

Հեռուստատեսության և ռադիոյի հանձնաժողովն (այսուհետ՝ Հանձնաժողով) ուսումնասիրելով 2023 թվականի մարտի 17-ին, իր նախաձեռնությամբ հարուցված թիվ 5 վարչական վարույթի նյութերը՝ պարզեց.

Հանձնաժողովի կողմից, «Տեսալսողական մեդիայի մասին» օրենքով (այսուհետ՝ Օրենք) վերապահված իր վերահսկողական գործառույթներն իրականացնելիս, Հեռարձակողների գործունեության մշտադիտարկման արդյունքում արձանագրվել է, «ԿՈՏԱՅՔ ԹԻ ՎԻ» ՍՊ ընկերության (այսուհետ՝ Հեռարձակող) կողմից հեռարձակվող «Կոտայք Թի Վի» տեսալսողական ծրագրի ընթացքում «Գովազդի մասին» օրենքի 15-րդ հոդվածի 15-րդ մասի դրույթի պահանջի խախտման փաստ:

Հանձնաժողովը ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի «բ» կետով, 2023 թվականի մարտի 17-ին, Հեռարձակողի նկատմամբ հարուցել է վարչական վարույթ՝ հիմք ընդունելով Հանձնաժողովի կողմից Հեռարձակողի գործունեության դիտարկման արդյունքների հիման վրա 2023 թվականի մարտի 17-ին կազմված մշտադիտարկման իրականացման և արդյունքների վերաբերյալ արձանագրությունը, որն Օրենքի 42-րդ հոդվածի 18-րդ մասի համաձայն հիմք է հանդիսանում վարչական վարույթ հարուցելու համար, իսկ հարուցված վարչական վարույթի շրջանակներում ծառայում է որպես վարչական վարույթի ապացույց:

Ըստ արձանագրության, Հեռարձակողի՝ «ԿՈՏԱՅՔ ԹԻ ՎԻ» ՍՊ ընկերության կողմից «Կոտայք Թի Վի» տեսալսողական ծրագրի 2023 թվականի մարտի 15-ի եթերում «Drive news» տեսալսողական հաղորդման ընթացքում գովազդվել է «Adjarabet.am»-ը, մասնավորապես.

«Drive news» հաղորդման ընթացքում (*հաղորդման փակողությունը՝ 21:35-22:01*), ժամը՝ 21:36:01-21:36:25-ին, 21:39:40-21:40:40-ին և 22:01:00-22:01:11-ին հաղորդավարը հիշատակել է «Adjarabet.am»-ի կազմակերպած խաղարկության մասին, «Adjarabet.am»-ում

գրանցվելու մասին, ինչպես նաև ավտոմեքենայի համարանիշի փոխարեն գրված է եղել «Adjarabet.am»:

Վերոնշյալը պարունակում է «Գովազդի մասին» օրենքի 15-րդ հոդվածի 15-րդ մասի խախտման հատկանիշներ, այն է՝ արգելվում է շահումով խաղի կամ ինտերնետ շահումով խաղի կամ խաղատան կամ խաղասրահի կամ վիճակախաղի (*այդ թվում՝ տոտալիզատորի*) կամ դրանց կազմակերպիչների ցանկացած տեսակի գովազդը, բացառությամբ իր պաշտոնական կայքի կամ խաղատների կամ շահումով խաղերի կամ ինտերնետ շահումով խաղերի կամ տոտալիզատորի (*խաղասրահի, բուքմեյքերային գրասենյակի*) շենքերի, շինությունների կամ սրահների մեջ կամ վրա, Հայաստանի Հանրապետության սահմանային մուտքի կետերում, ինչպես նաև առնվազն չորսաստղանի կարգին համապատասխան որակավորման պահանջներին և չափանիշներին համապատասխան հյուրանոցներում տեղադրվողների կամ սույն հոդվածով սահմանված դեպքի, իսկ խաղարկությունով կամ համակցված վիճակախաղի գովազդը թույլատրվում է նաև խաղարկությունով կամ համակցված վիճակախաղի վաճառակետերում:

Հանձնաժողովը հարուցված վարչական վարույթի մասին 2023 թվականի մարտի 17-ին, թիվ Ե/07/69-23 գրությամբ ծանուցել է Հեռարձակողին և հայտնել, որ այս հարցի վերաբերյալ կարող են ներկայացնել իրենց պարզաբանումները և բացատրությունները:

Հեռարձակողը, 2022 թվականի մարտի 27-ի իր գրությամբ, Հանձնաժողով է ներկայացրել նշված վարչական վարույթի վերաբերյալ իր պարզաբանումները նշելով, որ «Կոտայք Թի Վի» տեսալսողական ծրագրի եթերում 2023 թվականի մարտի 15-ին եթեր հեռարձակված «Drive news» հաղորդման ընթացքում արձանագրված «Գովազդի մասին» օրենքի պահանջի խախտումը սխալմամբ այլ հաղորդման հեռարձակման արդյունք է:

Հայտնել է նաև, որ տվյալ հաղորդումը նկարահանվել է 2019 թվականին և արխիվացվել է «Կոտայք Թի Վի» հեռուստաընկերության տեսադարանում:

Հեռարձակողը, գիտակցելով օրենքի խախտման պատասխանատվության լրջությունը, չցանկանալով դիտավորությամբ որևէ կերպ խախտել «Գովազդի մասին» օրենքի համապատասխան հոդվածը, հայցել է Հանձնաժողովի ներողամտությունը՝ խոստանալով այսուհետ «Կոտայք Թի Վի» ՍՊԸ տեսալսողական ծրագրում բացառել ՀՀ Օրենքի խախտման որևէ դեպք:

Հանձնաժողովի հիմնավորումները (պարճառաբանությունը) և եզրահանգումը.

Այսպիսով, վարչական վարույթի բազմակողմանի, լրիվ և օբյեկտիվ քննությամբ, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

Օրենքի 2-րդ հոդվածի 1-ին մասը սահմանում է.

«Հայաստանի Հանրապետության տեսալսողական մեդիայի մասին օրենսդրությունը ներառում է Հայաստանի Հանրապետության Սահմանադրությունը, սույն օրենքը, «Զանգվածային լրատվության մասին», «Էլեկտրոնային հաղորդակցության մասին», «Հեղինակային իրավունքի և հարակից իրավունքների մասին», «Լեզվի մասին», «Գովազդի մասին» օրենքները, Հայաստանի Հանրապետության ընտրական օրենսգիրքը,

կարգավորող պետական մարմնի իրավական ակտերը, տեսալսողական մեդիայի ոլորտը կարգավորող այլ իրավական ակտեր և Հայաստանի Հանրապետության միջազգային պայմանագրերը:»

Օրենքի 14-րդ հոդվածի 7-րդ մասի համաձայն՝ Հեռարձակողների կողմից գովազդի հեռարձակումն իրականացվում է սույն օրենքի և «Գովազդի մասին» օրենքի պահանջներին համապատասխան:

«Գովազդի մասին» օրենքի 15-րդ հոդվածի 15-րդ մասը սահմանում է.

«Արգելվում է շահումով խաղի կամ ինտերնետ շահումով խաղի կամ խաղատան կամ խաղասրահի կամ վիճակախաղի (այդ թվում՝ տոտալիզատորի) կամ դրանց կազմակերպիչների ցանկացած տեսակի գովազդը, բացառությամբ իր պաշտոնական կայքի կամ խաղատների կամ շահումով խաղերի կամ ինտերնետ շահումով խաղերի կամ տոտալիզատորի (խաղասրահի, բուքմեյքերային գրասենյակի) շենքերի, շինությունների կամ սրահների մեջ կամ վրա, Հայաստանի Հանրապետության սահմանային մուտքի կետերում, ինչպես նաև առնվազն չորսաստղանի կարգին համապատասխան որակավորման պահանջներին և չափանիշներին համապատասխան հյուրանոցներում տեղադրվողների կամ սույն հոդվածով սահմանված դեպքի, իսկ խաղարկությունով կամ համակցված վիճակախաղի գովազդը թույլատրվում է նաև խաղարկությունով կամ համակցված վիճակախաղի վաճառակետերում» :

«Գովազդի մասին» օրենքի 24-րդ հոդվածի 2-րդ մասի համաձայն՝ Տեսալսողական մեդիայի ոլորտում գովազդի մասին օրենսդրության պահպանման նկատմամբ վերահսկողություն իրականացնող՝ Հայաստանի Հանրապետության պետական կառավարման լիազորված մարմինը Հեռուստատեսության և ռադիոյի հանձնաժողովն է:

Օրենքի 32-րդ հոդվածի 1-ին մասի 14-րդ կետի համաձայն՝ Հանձնաժողովը իրականացնում է Հեռարձակողների և օպերատորների գործունեության մշտադիտարկում:

Օրենքի 42-րդ հոդվածի 1-ին մասի համաձայն՝ Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով, իսկ նույն հոդվածի 8-րդ և 9-րդ մասերը սահմանում են.

«8. Մշտադիտարկման արդյունքներով կարգավորող պետական մարմնի ներկայացուցիչը մշտադիտարկման արդյունքների վերաբերյալ կազմում է արձանագրություն:

9. Մշտադիտարկման արդյունքների վերաբերյալ արձանագրության մեջ նշվում են մշտադիտարկման արդյունքների համառոտ շարադրանքը, ինչպես նաև վարչական վարույթ հարուցելու կամ հարուցված վարչական վարույթի համար էական նշանակություն ունեցող բոլոր փաստական հանգամանքները, այդ թվում՝ վարույթի մասնակիցների օգտին առկա հանգամանքները:»

Հիմք ընդունելով վերը նշված իրավական դրույթների պահանջները, Հանձնաժողովն ամրագրում է, որ Հեռարձակողը գովազդը հեռարձակելիս պարտավոր էր պահպանել Օրենքով և «Գովազդի մասին» օրենքով գովազդի առանձնահատկությունները սահմանող դրույթները:

Փաստենք, որ Հեռարձակողը հանդիսանում է Հանձնաժողովի կողմից լիցենզավորված իրավաբանական անձ, որը կազմում և սպառողին է ներկայացնում տեսալսողական տեղեկատվություն և խմբագրական պատասխանատվություն է կրում տեսալսողական արտադրանքի բովանդակության համար և պարտավոր է պահպանել տեսալսողական մեդիայի բնագավառը կարգավորող օրենսդրության պահանջները, իսկ օրենքի դրույթները խախտելու դեպքում կրել պատասխանատվություն օրենքով՝ սահմանված կարգով, ուստի, օրենքի պահանջի չկատարումն ինքնին բերում է պատասխանատվության:

Հեռարձակողը պետք է հաշվի առնի, որ օրենքներով հստակ սահմանվում են իրավական նորմեր, որոնց չպահպանելը առաջացնում է իրավական հետևանքներ և Հեռարձակողը պատասխանատվություն է կրում տեսալսողական մեդիայի ոլորտը կարգավորող օրենսդրության կիրառման ապահովման համար և տվյալ դեպքում Հեռարձակողը պարտավոր էր պահպանել «Գովազդի մասին» օրենքի 15-րդ հոդվածի 15-րդ մասով սահմանված դրույթի պահանջները:

Հանձնաժողովի կողմից հաշվի է առնվել վարչական վարույթի ընթացքում Հեռարձակողի կողմից ներկայացված պարզաբանումներն ու փաստարկները, մասնավորապես, որ «Կոտայք ԹՒ ՎԻ» տեսալսողական ծրագրի եթերում 2023 թվականի մարտի 15-ին եթեր հեռարձակված «Drive news» հաղորդման ընթացքում արձանագրված «Գովազդի մասին» օրենքի պահանջի խախտումը սխալմամբ այլ հաղորդման հեռարձակման արդյունք է, և որ տվյալ հաղորդումը նկարահանված և արխիվացված է եղել հեռուստաընկերության տեսադարանում 2019 թվականին, սակայն դրանք բավարար հիմք չեն կարող հանդիսանալ Հանձնաժողովի կողմից «Գովազդի մասին» օրենքի 15-րդ հոդվածի դրույթով սահմանված իրավախախտումը չարձանագրելու և պատասխանատվությունը չկիրառելու համար:

Այսպես, հիմք ընդունելով Օրենքի վերը նշված դրույթները և ձեռք բերված փաստերը՝ այն է «ԿՈՏԱՅՔ ԹՒ ՎԻ» ՍՊ ընկերության կողմից «Կոտայք ԹՒ ՎԻ» տեսալսողական ծրագրի 2023 թվականի մարտի 15-ի «Drive news» հաղորդման ընթացքում գովազդվել է «Adjarabet.am»-ը, մասնավորապես՝ «Drive news» հաղորդման ընթացքում (*հաղորդման փրոտոկոլները՝ 21:35-22:01*), ժամը՝ 21:36:01-21:36:25-ին, 21:39:40-21:40:40-ին և 22:01:00-22:01:11-ին հաղորդավարը հիշատակել է «Adjarabet.am»-ի կազմակերպած խաղարկության մասին, «Adjarabet.am»-ում գրանցվելու մասին, ինչպես նաև ավտոմեքենայի համարանիշի փոխարեն գրված է եղել «Adjarabet.am»:

Օրենքի 32-րդ հոդվածի 1-ին մասի 11-րդ կետի համաձայն՝ կարգավորող պետական մարմինը՝ Օրենքի խախտման կամ իր որոշումները չկատարելու դեպքում կիրառում է պատասխանատվության միջոցներ:

Օրենքի 55-րդ հոդվածի 1-ին մասի համաձայն՝ Կարգավորող պետական մարմնի կողմից տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու, ինչպես նաև պետական այլ մարմինների կողմից իրենց իրավասությունների շրջանակում տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու և դրանց

մասին կարգավորող պետական մարմնին գրավոր տեղեկացվելու դեպքում կարգավորող պետական մարմինը կիրառում է հետևյալ վարչական տույժերը.

- 1) գրավոր նախազգուշացում.
- 2) տուգանք.
- 3) հեղինակազորման կամ լիցենզիայի գործողության կասեցում.
- 4) հեղինակազորման կամ լիցենզիայի գործողության դադարեցում:

Օրենքի 57-րդ հոդվածի 16-րդ մասի համաձայն՝ Հեռարձակողի կողմից «Գովազդի մասին» օրենքի պահանջները խախտելը՝ առաջացնում է տուգանքի նշանակում՝ Հասույթի 0.03 տոկոսի, բայց ոչ պակաս, քան սահմանված նվազագույն աշխատավարձի հինգհարյուրապատիկի չափով:

Այսպես, ելնելով վերոգրյալից և ղեկավարվելով «Տեսալսողական մեդիայի մասին» օրենքի 14-րդ հոդվածի 7-րդ մասով, 32-րդ հոդվածի 1-ին մասի 11-րդ կետով, 55-րդ հոդվածի 1-ին մասի 2-րդ կետով «Գովազդի մասին» օրենքի 15-րդ հոդվածի 15-րդ մասով, և 24-րդ հոդվածի 2-րդ մասով և հիմք ընդունելով Օրենքի 57-րդ հոդվածի 16-րդ մասը՝ Հեռուստատեսության և ռադիոյի հանձնաժողովը **որոշեց**.

1. «ԿՈՏԱՅՔ ԹԻ ՎԻ» ՍՊ ընկերության նկատմամբ կիրառել «Տեսալսողական մեդիայի մասին» օրենքի 57-րդ հոդվածի 16-րդ մասով սահմանված վարչական տույժը, տուգանելով սահմանված 500000 (հինգ հարյուր հազար) ՀՀ դրամի չափով:

2. Սույն որոշումն ուժի մեջ է մտնում այն «ԿՈՏԱՅՔ ԹԻ ՎԻ» ՍՊ ընկերությանը պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ
ՀԱՆՁՆԱԺՈՂՈՎԻ ՆԱԽԱԳԱՀ**

Տ.ՀԱԿՈԲՅԱՆ

10 ապրիլի 2023թ.
ք.Երևան